

*Enkele vragen van de 'clerc' en antwoorden van de meester betreffende het wezen van God, het paradijs, de maagdelijkheid van Maria en de kruisdood van Jezus Christus. Zie voor de Lucidarius ook Wereld in woorden pagina 183 e.v.*

**Meester, nu bericht mi des,  
wat dinghe dat God selve es?**

God is een substantie sekerlike  
altoes wonende in hemelrike,  
van soe groter moghentheit  
ende van so groter over wijsheit  
ende van so groter claerheit  
- als ons die Scrijfture wel seit –  
dat die inghelen vanden trone,  
die woenen inden hemel scone  
sijn 7 warf clare int ansichte  
dan die zonne mit haren lichte;  
nochtan begheren si onversadeliken  
te sien Gods ansijn van hemelrike.  
Nochtan is dat allegader niet  
bider claerheyt die men an Gode siet.  
Hi es so scone ende soe clare  
dat sire alle bi leven dare  
mit groter blijschap sonder verlanc,  
en gheen wesen dunct hem lanc  
die oyt daer mit Hem hebben ghesijn.  
Het en dunct hem niet dan 1 wijlkijn.  
Dat doet Gods almachtichede,  
die al vervult die hoghe stede.  
Onvertallicke glorie sal daer wesen,  
nemmere sal mens den leken lesen.

**Noch segt mi, meester, tonser lere:  
Waer woent God, Onse Lieve Here?**

Clerc, bi Sijnre groter moghentheit  
es Hi in allen steden geleit,  
noch is Hi lichamelike  
altoes wonende in hemelrike.  
Sident dat God, die Here groet,  
voer in den hemel na Sine doet  
sone quam Hi in dese werelt niet  
met sinen lichame, dat besiet.  
Mer Sine gracie ende goedertierenhede  
die sijn al omme in elken stede  
daer die gerechtige mensche es,  
des sijt seker ende ghewes,  
daer men an roept met herten claer.  
Sine ghenaden comen daer,

ist inde zee, ist in vloede,  
opt lant of in viers gloede,  
altoes is Hi gereet  
wiene mint mit herten heet,  
hem te helpene ende bi te stane  
ende hem niet af te gane.

**Bericht mi, meester, als ic gome,  
of God int paradijs plante bome.**

Int paradijs plante Onse Here God  
alrehande hout, na Sijn gebod.  
Oec seide hire diere niet om en loech  
dat God plante inden hove hoech  
alder tieren froyt van smake sochte  
om dat den man genoeg mochte  
bede die sake ende dat op sien.  
Inde midde waert van dien  
soe plante Hi des levens hout,  
dat heeft die cracht ende die gewout  
dat het groten vrucht mach geven,  
gesonde ende lange leven.  
Noch seggen somme boeken meer  
datti mach leven emmermer  
die dat nutte vander vrucht  
die staet ins paradijs lucht  
die God oec plante daer binnen,  
den boem die quaet ende goet doet kinnen.  
Die heeft daer om den naem ontfaen  
daer om datter Adaem in heeft misdaen.  
Daer is sulc boem, seit die vite,  
diere of ate hi ware quite  
van honger, van dorste. Nu besie,  
daer is sulc boem, seit men mie,  
int paradijs, sonder waen,  
die alle moetheit doet vergaen.  
Daer sijn bome tieghen alle quale  
inden paradise geplant wale.  
Daer sijn oec 4 rivieren;  
hare namen willic u visieren:  
Phison of Gangnes heet die een,  
diere dore loept herde reen.  
Men vint gout in hare sant,  
tbeste dat yeman vant.  
Gyon of Nylus comt gelopen  
doer dat lantschap van Europen.  
Dus hieten dander 2 rivieren  
Tigris ende Efrates, dus esser viere.  
Dicke lopen si doer die aerde  
ende doen hem wech hare vaerde.

Dese comen uut sparadijs stat,  
also die boken orconden plat.

**Gaf hem enige cleideren God,  
als si braken Sijn ghebod?**

Ja hi, beide Yeven ende Adame,  
om te decken haren lichame.  
Hi gaf hem 2 rocken van beesten velle.  
Daer bi verstaen wi, na mijn vertellen:  
dit dechsel is van doden dieren,  
ende du best sterfelic in allen manieren,  
ende al dat van di comen sal,  
sal ter doot, groet ende smal.  
Doe stac Hise uten paradise,  
om dat si aten verboden spise.  
7 uren of luttel min  
waren si ten paradise in,  
maer hadden si Gods gebod gedaen,  
si waren daer in bleven, sonder waen.

**Bericht mi, meester, of ghi mi mint,  
hoe Maria ontfinc haer kint.**

Clerc, gelijc dat wilenerre  
bider cracht van Onsen Here  
die droge roede ontfinc watere,  
also ontfinc si haers sceppers lede  
mit ave den soeten woerde  
dat soe vanden ingel hoerde  
als hi seide dat si soude  
dragen een kint sonder mans scoude.  
Mitten worde soe ontfinc  
den Gods Sone, dats waer dinc,  
in haren gebenediden lichame.  
Dat was ons allen grote vrame.  
Belokenre dore quam Hi nare,  
dit is alle der werelt clare,  
ende nam an hare menschelike nature  
ende ghinc uut beslotenre dure.  
Sonder pine genas si van Hem,  
der af ic wel seker ben.  
Ende die Gods Sone, onse broeder,  
lach 9 maende in Sijnre moeder  
in bekennessen dat Hi die 9 coren  
wilde verlossen die waren verloren  
mit salige zielen ende mit sconen  
ende bringen in den hogen trone.  
Ter minnacht quam Hi ter werelt in  
om te verclaren smenschen sin,

die in die deemsterheden verdoelde  
ende in die zwaren sonden vermoelde.  
Maer Sijn moeder, die suver maecht,  
heefter ons aflaet af bejaecht.

**Waer omme starf Hi ant hout,  
Die Here die quite onse scout?**

Clerc, om dat Hi verlossen wilde  
die lagen ins duvels gewilde,  
die biden houte waren verloren  
ende moesten dogen der hellen toren,  
om dat Adaem inden appel beet,  
daer noch die duvel fel ende wreet  
tonswaert draecht groten nijt  
om dat wi lagen in sijn bijt  
ende mitten cruce sijn ondregen  
daer God, Onse Here, an was geslegen.  
Dat cruce was van houte viere.  
Dat dede God in dier maniere  
datti mitten cruce die 4 hoeken  
der werelt wilde besøeken  
wie dat Sine vriende waren  
enden hem Sine doot openbaren,  
dat si souden pensen om die smerte  
her leven dore, mit goeder herten.

Bron: N. Klunder, *Lucidarius. De Middelnederlandse Lucidarius-teksten en hun relatie tot de Europese traditie*. Amsterdam 2005, 385-407.